

ጳውሎስ ቲቶሃ ከተሶ ሶህኑተ ኣጉስ

ቲቲ ሀንቅ መገኑ አመዕንዮበእ ኡመቲቶ አመዕነት አደ ፈንቀሎሃ እህን ጳውሎሴሃ እንጂል ሆጎን መደስ እክ ሀዕለኖስ ሆጎስያ ጃለ እቅ፤ ጳውሎስ ከ ሶህኑተ ከተሶሁ ኡምሪን ቀው እኮ ሆጎስ ጃሊሃ ቲቶሃ እኮቤቺሃ ቲቲ ህከ ወክት ዱእ ምኒ ሆጉተ አገረን ቀርጤሳን ሄኣኖ እቅ። ሶህኑስ ለልሳኢሁ ሰሱ ቡዕለ እኮ ጠውኒት፡-

1. ጳውሎስ ቀርጤስ ባድ መን ሂለ ሃል ደገኖቤቺሃ ህከን ባደን አመዕኖኖ ጭምት አዎንሳኑት ሀትናሙ እሁ ሀስሰኖ ጎሬ ቲቶሃ ጠረኝሽ ሸዘነተ ኣሴስ።
2. አመዕኖኖ ጭምት ኣዜን ባልቆ ጎነለከ ሜንቱ ህትን ወደልቺ ጎነለከ ሜንት ካዲመተ ሀት ተማርሱ ሀስሰኖ ጎሬ ቲቶሃ ሸዘነተ ኣሰኖኡ።
3. መጨረሻን አመዕኖኑት ሀት ሄኡ ሀስሰኖስ ጎሬ ወገሬቲንለከ ኢታን ሄእን አመዕኖኖ ጭምት በሊቶ ብተተ፡ ኦደተለከ መለዕለንሽ ቤሶተ ጳውሎስ ቲቶ ሸኾሶ።

መጻፉስ አፎሃ

ኣጉስ (1፡1-4)

ዱእ ምኒ አዎንሳኑት (1፡5-16)

መገን ምኔን ካድመ አደደ ሆጎ ወጥ (2፡1-15)

ሸዘነተለከ ኤገተ (3፡1-11)

መጨረሻስ (3፡12-15)

1 መገን ካዲንቹለከ መሲህ ኢስ አሳቤቹ እኮም ጳውሎስ መገኑ መጠርስ መነ አመዕነትቤቹ ገኢሃለከ መገኑ አጉድ ሀት እክ ሄኡ ሀስሰኖስ ጎሬ ለሊሰኖ ሀንቅ ደጎተ ተማርሶተ ሹመ እኮም ጳውሎሴቶ ሶሀሞእሃ፡-

2 ሁኩ ሀንቁ ዘላለሚሃ ሄኡ ተሬገጥሲሽ ኣሰኖ፤ ህካንን ዘላለሚሃ ሄኡ ኣሰኖ፤ ዘመኒቶ ብርተ ሄጭ ጠወዕኖሁ ክዘብበሃ መገኑ።

3 ዘማኑስ ኢሌ ወክት ፊሳንቹሃኔ መገን ትዛዚን እን ዱዱብሶተ ኣሰሞኤ ዱዱብስ ኤገ መሳን መገኑ ሶህኑስ ለልሹ።

4 ሜጡበ አመዕንኖም አመዕነቲን ሀንቅ ቤቱኤ እኮ ቲቶ እነ እኮ መገኒቶላከ ፌሳንቸ መሲህ ኢሲቶ ኣሰቱትላከ ወገሬቱ ኬሳሃ እሁን።

ቲቱ ቀርጤሳን አዕኖ ሆጉተ

5 ኬሳሃ ቀርጤሳን አጉሮም መሰት መክበርቹ መክሶተላከ እን አዘዡንኬገን ከተማን ጉዕማንን አመዕኖኖ ባልቀተ ሾንቶታት።

6 አመዕኖኖ ባልቀንኩ ቀነጤኖሰርቹ ኖበኢሃ፡ መቲ መንቾ ምኒ እነ እኮኢሃ፡ ማሊት አእንላከ አዘዛሙ ሆጊን ዋቀሰንትቡ መገኑ አመዕንቶ እላት ኖሲሃ እሁ ሀሰሰኖሰ።

7 መሰንትሰ አመዕኖኖ ዱእ ምኒ አዎንሳንቹ መገን ሆጎ ኤገተ ቶሳሃ እኮቤቹሃ ቀነጤኖሰርቹ ኖበኢሃ እሁ ሀሰሰኖሰ፤ እሰን ቦንባሃ፡ ኡሙዕርባሃ፡ ሰከርባሃ፡ ብተምባሃላከ ብሪሃ ጎራይባሃ እሁ ሀሰሰኖሰ።

8 ጠዉ እኮጎሬ ኮሃ ቶገኖሃ፡ ጡመ ጠወ ኢተኖሃ፡ ገዉስ አገዕረኖሃ፡ ሀንቅ ኢተኖሃ፡ መገን ሆጎተ አደ እኮሃላከ ኖሰ ጌሲን ሄእኖ እሁ ሀሰሰኖሰ።

9 እሰን ዋሉ መነ ሀንቅ ትምህርት ተማርሰን ሸዙተላከ ህከ ላገተ ኦደ መኒሃ መሰለ ኣሶተ ከኒቶ ብርተ ተማር ትምርት ሃለን አመዕንቶ ላጋን ጠረቹን።

10 ልግቡ መኑ በትሸን አይሁድ አድረ እኮእሩ ጡርከሜኖ ሴሪ አዎንታሩ፡ አዘዘንትበረላከ ተሰ እኮ ጠወ ጠወእን ሉሲሳእሩ ኖኡ።

11 ከ መናከተ ሰዕም ይታገ እኡ ሀሰሰኖ፤ እሰን ገበእበ ትርፈ ደእቶት ገበእበ ጠወ ተማርሰተን አበሮሱ ጉዕመንከ ኩማዳእ።

12 እሳቶ መቱሰ ገይሰ ራጋንቹ «ቀርጤሰ መኑ ጉዕመ ወክት ክዝበኛኑተ፡ ሂለ ቡሳወ እኮእራ፡ ሆጉተ ኢትቲበለከ ጎራሜቻኖታን» ዩእ።

13 ኩ መሰከረሞ ጠዉንኩ ሀንቅሃን፤ ህካን እኮቤቹሃ ዊሙ አመዕነቱ ሄኣሰተ ከ መነ ጠረኝሰ ኡሙዕር።

14 አይሁድ መን ማቁተ አዎንትበገለከ ሀንቅ ግብ ኦደ መን ትዛዝ ዋጮጭትበገ ጠረኝሰ ኡሙዕርሰ።

15 ነጠ መኒሃ ጉዕሙርቹንኩ ነጠሃን፤ ጠው እኮጎሬ ንጃሶህኩተላከ አመዕንትበሀኩተ መቱርቹሁ ነጣበእ፤ ህትን ቀልቡሰለከ ሰው ይታርቹ ንጃሾእሃን።

16 እሰን «መገኑ ደንጋም» ይተን ሆጎንተሰ እሱ ለገኣእረ፤ ህትን ኮፍ ይታእረ፡ አዘዘንትበረላከ ጡመ ሆጉተ እኡ አታልትበረ።

2

ሀንቅ ትምርትተኔሃ

¹ እት እኮጎሬ ሀንቅ ትምህርት ተማርሰ።

² ኡሙሪን ባልቆ ጎኑ ወልቀሰ ጌሲን ሄኣእራን፤ ኬዕምኣሰ አገርታእረ፤ ገውሰ አገርታእረ፤ አመዕነቲንለከ ኢታን አታዕሊኒን ሂልመት ዮሰበእረ እካገ ሸዝሰ።

³ ህትን ኡሙሪን ባሊቆ ሜንቱ አመዕነቱሰ አገርት ሄኣእረ ሄዕምትበረለከ ሰከርትበረ ጡመ ጠወ ተማርሰታእረ እካገ ሸዝሰ።

⁴ ህትን ባሊቆ ሜንቱ ሀርድ ሜንቱ ምንሰ አናኑተለከ እለሰ እትታእረ።

⁵ ገውሰ አገዕርታእረ፤ ነጣኑተ፤ ጉዕመርኝንን ምንሰ አገርታእረለከ ምንሰ አናኑተ ኬዕምሳእረ እካገ ተማርሰቱንሰ፤ ህካንን አታኢሁ መገን ላገት ህንቀንታበእጋት።

⁶ ህትን ዎደልቹ ገውሰ አገዕር ሄኣኖገ ሸዝ።

⁷ እት ጡመ ጠወ አተን ጉዕመ ጠዋንን ሞሳልተ እህ፤ ትምርቲንከክ ሀንቅ መንቹ እሁክለከ ደግለለኖ ጠወ ዮሄ መንቹ እሁክ ለሊሰ።

⁸ ህንቄኖበእ ጡመ ጠወ ለሊሰሰ፤ ከን ሃሌን ኔሳሃ ግባኔሩ ኒ አሌን ጠወአ ሂለ ጠወ ሆጋረ ሙልታአ።

⁹ ካዲመት ቀርቻኖተሰ አዘዘንታገ፤ ጉዕመርኝንን ቀርቻኑሰ ሙንዲሲሳገ፤ ሂለ መሰለ ፈንቀሽት ጠወአበእገ።

¹⁰ ሞግትበገ ሸዝሰ፤ በትሸን ፌሳንቹሃኔ መገን ትምርቱ ጉዕመ ጠዋንን ኢተሞሃ እሆተ ጉዕመ ወክት ዊመ ደገንቶእረ እኩን።

¹¹ መገኑ መነ ጡምሰኖ አሰቱሰ ጉዕሚንከ ለሊሾኡ።

¹² ሁኩ አሰቱንት ለግተለከ ኣዲንያ አል ሄዕላቸተ አጉሬን ገዉ አገዕሪን፤ ጌጥዬለከ መገኑ አጉዲን ከን ዘማኔን ሄዕኖተ ተማርሰኤ።

¹³ ከን ሃሊን ማሰአሞ ተብሳኔ ሁኩንን ሎሩ መገኑኔለከ ጡምሳንቹኔ መሲህ ኢሰ ኬዕምኝን አሜቱሰ አገዕርኖም።

¹⁴ መሲህ ኢሰ ሾከማቶ ጉዕሚቶን ጡምሶኑተለከ ጡመ ሆጉተ አዕኖተ ጠረኛኑተለከ እሲሃ አደ እንኮም ነጠ ኡመት እንኮተ ነጠ አኔኑተ ኒተኔሃ ገዉሰ ሀግሽ ኣሴእ።

¹⁵ ቱሱ ከ ጉዕመንከ ጠወ ዊመ ሹምነቲን ተማርሰ፤ ሸዝ፤ ኡሙዕር፤ አዪሁ ህንቁንከሄ።

3

አመዕናኖ ሄእተኔሃ

¹ መኑ ጉዕመንኩ ገሽታሰሀኑኤተለከ ዳኛኖተ ገዢ ሆኖስ አዘዘንቶተ ጡመ ሆጉተ ጉዕመንከ እቶተ ተቃጠቦረ እኮተ

² ሀከን መንች አሌኒ ሂለ ጠወ ጠወአበእገ ሰዉ ይታገ አእሰ፤ በትሽን መኒን ብተንትበረለከ ጎደበ ላፋኑተ፥ ገዉ ሙግ አኤን ሄኡ መኒሃ ጉዕመንከ ለሊሳእረ እኩን።

³ ነኡን ከኒች ብርተ ገዋኑተ፥ ትዛዝ ቶንግበረ፥ ጡመ ዋቃሃ ለንሶምረ፥ አደደ ሂለ ሄዕላቻተለከ ማል ተሸቲሃ ጠገምምረ፥ ተንኮንለከ ምቀቆማን ሄዕናምረ፥ ግበምምረለከ መት-መቲንከኔ ኢተቀምበረ እቆ።

⁴ ጠው እኮጎሬ ጨብችኔ ጡምሾኔ መገንኔ ጎደብ ለፍመትለከ ኢተት ዊንቶ አሙዙ ለሌ ወክት

⁵ ነኡ አዕናም ፈየ ሆጎንተኔ እሁዕናን ገዉንኩስ ማርቶንከስ ጡምሾኔ፤ ጡምሾኔንኩ ሃዕሮ አለሚን አዕሊንለከ ጠሊሊ አያኒን ደገም ሃዕሮሃ ሄኡ።

⁶ መገኑ አሰቶንከስ ጡምሳንቹሃኔ መሲህ ኢስ አዲን አያነሰ ኒ አሌን በትሽ ደፈፍሾኔ።

⁷ ህካንን አዕዮሁ አሰቶንከስ ፈያኑተ እንክ ተብሴን አገርናም ዘላለሚሃ ሄእኖ ሄኡ ረገዕናታት።

⁸ ኩን አመዕነሞእሃ ጠወ፤ መገኖን አመዕንቶ መናከት ጡመ ሆጎተ ጠረኝቶተ ከ ጠወ ጉዕመንከ ጠረኝስ ቃግሶተ ሀሳም፤ ኩ ጠወንኩ ጡመለከ ጉዕመ መኒንከ ደግለለኖሃን።

⁹ ጠወ እኮጎሬ ተሰ እኮ ኦዳች፥ ደቦ ዋልንሺች፥ ብታች፥ ሕግ መሳን ኬእኖ ጠዊች ቄዕር፤ ህትኔ ጠወንኩ ደግለልባሃለከ ተሰሃን።

¹⁰ አደደመተ ኤበኖ መንቹ መቶረ ህከረንገ ለሞረ ሸዞንትሲች ኤተሮን እሲች አደ እህ።

¹¹ ህትኔ መንቹ ሂላለከ ጨበኛሃን፤ እስ ገይሰ አሌን ፈረጆ እሁስ ደግ።

መጨረሻ ሸዞን

¹² አርጤማሴ ህከረንገ ትኪቆሴ ኪቤቹ ሶሃም ወክት አን ዮም ቤቹ ኒቆጵልዮን ደዕልት አም፤ አን ከርም ህከኔ ዱንኮተ ሙዕርዮም።

¹³ ሕገ ደገኖ ዜናሰለከ አጽሎስ ዋቃስ ሃንቶተ ደግለለኖሰርቹ ጉዕመንከ ሀዕልሰ።

14 ኒ መኑንኩ አቶቱ ዮበኢሃ ፈቃበእገለከ ደግለሸቀም ኦርሻች
ጡምቶተ ጡመ ሆጉተ አኡ ተማርቱን።

15 ኢን ሜጡበ ዮኢሩ ጉዕመኑኩ «ዋገሬቲ ዮንተንዶ?»
ይቶህዕኔ ይሰ፤ አመዕነቲን ኒን ሜጡበ እኮ ጃላተኔ ጉዕሚንከ
ወገሬት ኢልሰ።

መገን እስቱት ጉዕሚንከክዕኔ ሜጡበ እኩን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d